

明氏實錄

明 新都楊學可 編

夏國主姓明氏諱玉珍湖廣隨州人也母夢與神遇遂  
娠而生珍珍長有異相身高八尺二目重瞳家世以農  
畝爲業珍素有志不屑爲也至正辛卯兵起潁蔡閒  
玉珍一日謂鄉耆老曰元君無道天下兵起荼毒吾儕  
將亦不免也爲之奈何耆老對曰明公平日勇略人所  
信畏集鄉兵屯青山量力審時大則進取小則自衛盍  
策之玉珍曰善因部署諸鄉豪因分屯要害且修柵治

城以有眾十餘萬眾遂推爲屯長會王辰徐壽輝兵起於蘄越癸巳冬十一月稱號建都漢陽遣使招玉珍曰予起兵舉義期逐元虜以靖中夏若歸共圖大事甚善不來且先加兵珍懼且欲保護鄉里不得已從焉壽輝待以殊禮授統兵征虜大元帥仍領所部益兵俾鎮沔陽時元帥哈麻禿爲患洞庭珍以兵誅之連戰湖中爲流矢中右目甲午秋沔陽水澇連年民採菜魚而食乙未春珍領兵萬餘駕斗船五十艘至夔州府哨糧時夷陵皆屬徐國參政姜珏所轄珍泝流巫峽糧皆滿載蜀

人亦不覺有擾也丙申冬珍自巫峽將還先是元義兵元帥楊漢領精兵五千屯兵西寨重慶行省右丞相完者都齋宣招納丁酉春三月完者都與漢飲酒閒殺之圖有漢眾漢將士謀復讎不克憤怒擄船下流至是遇珍投焉且訴其所由因言重慶城中止有左丞哈麻禿右丞完者都別無重兵厚貯况二人懷異甚不相得請盡力攻之全蜀可圖也珍猶豫未決萬戶戴壽進曰明公修兵沔陽爲民也哨糧於蜀亦爲民也不若發糧十之三回沔以濟荒存其餘同漢兵以取重慶事濟則有

爲否則掠其財物而歸何損也且此兵之出窺隴蜀據上流保荆襄開糧道一舉三得幸無他慮珍從之是時蜀中承平日久俄見兵船遠近騷動完者都率所部夜遁生擒哈麻禿重慶城中父老焚香拜迎道左珍禁止侵掠秋毫無犯由是四外投降絡繹卽遣使解送哈麻禿等并捷報至徐國丁酉秋徐授珍以隴蜀省右丞戊戌春二月完者都自果州來會蜀省平章卽革歹參政趙資率兵屯嘉定州謀取重慶珍調義弟明三領兵泝流圍攻嘉定未克相守半載珍兵駐瀘州宣使劉澤民

曰此閒元進士劉楨字維國者有文章能政事歷仕大石路經歷因青巾李喜入蜀大肆殺戮隱居方山曷往見焉珍曰可與俱來澤民曰此人可就見不能招也翼日珍往見之與語喜曰吾得一孔明也邀至舟中與論國事拜爲理問己亥遣使進貢于徐國珍親領兵至嘉定圍之令明三率銳兵直趨成都時平章買奴參政韓叔亨爲青城賊所執城中窘迫惟都事薛元理署省事守城兵皆新募者一聞明兵至大驚潰明三領兵徑入省中擄郎革歹趙資妻子順流而歸郎革歹妻謂舟中

人曰吾家祖宗三世受羊皮宣命吾爲平章夫人義不受辱自投于江明三以趙資妻見珍珍待以禮曰執政乃吾中國人何故反爲元虜守戰夫人能招使降當裂土以贈異日兩軍會戰珍驅資妻子臨陣謂資曰妾與鎖兒受擒于此明公甚以禮待參政念結髮之情救子母之命言旣號泣兩軍觀者淚下資駐馬執弓厲聲曰癡婦不死何待乃引弓發矢中其胷臆之上珍揮兵勇進左右刦襲元兵大潰遂生擒完者都郎革歹趙資至重慶戮于大十字街以禮葬之庚子春陳友諒殺徐主

壽輝自立爲帝珍曰友諒倪文進在徐國同爲臣子今弑逆其主徐當討之遂令莫仁壽領兵守夔不與相通立徐廟于城南春秋奉祀眾推玉珍爲隴蜀王因下令曰元朝運去中國豪傑竝起而逐之予本鄉農因亂爲眾所推殆爲自保豈敢圖人邇者義兵一起羣醜底平湖湘向化顧茲蜀地久被青巾之亂莫有爲之剪除者予奉天誅罪豈能自安已經殄滅兇徒幸爾坐收全蜀是乃天意夫豈人謀方今圖爲畫一之規與民共享太平之治誠恐百姓不知以予爲爭地殺人之師非弔民

學海類編 卷一百一十五  
伐罪之舉予取爾蜀于青巾之手非取諸元爾輩亦當復見中華文明之化不可安于元人之陋習也更宜洗心從治慎弗取惡招尤辛丑夏四月拜劉楨爲王國參謀朝夕侍講書史裁決政事楨一日屏人從容說珍曰西蜀形勝雖小沃野千里北有劍門可以窺隴西東有夔塘可以達江左今民遭青巾之苦幸獲扶養頗得蘇息人心之歸天命可知他日大事可舉也此時若不稱大號以繫人心軍士俱四方之人思其鄉土而去明君雖自保全蜀尙難况欲天下乎珍勿聽明日劉楨又言

戴壽張文炳力贊之聲息已彰于外悅服者多珍不得已資謀于眾從焉

天統元年壬寅春三月戊辰祭告天地卽皇帝位建都重慶國號大夏改元天統詔曰天生斯民必立司牧夏商周之迭運漢唐宋之繼統其來遠矣元以北人汚我中夏倫理以之晦冥人物爲之銷滅咸云天數敢謂人謀邇者子孫失道運祚衰微上天有命示厭棄之機豪傑乘時興驅逐之策惟我國家肇迹湖湘志欲除暴救民聊爾建邦啓土成湯七十里盛德已振于三巴歷數

八百年神功終收于一統上承天命下順民心謹以壬寅年三月初一日祭告天地祖宗及歷代帝王卽皇帝位國號曰大夏其以今年爲天統元年嗚呼恭行天罰革彼左衽之卑汚昭顯茂功成我文明之大治尙賴遠近豪傑勿吝嘉謀庶幾大小臣工協登偉績立郊社祭以春秋追帝其四代立廟祭以四時分蜀地爲八道行周制設六卿拜戴壽爲冢宰明三復姓名萬勝爲司馬張文炳爲司空尙大亨莫仁壽爲司寇吳友仁周興爲司徒劉楨爲宗伯置翰林院拜年徒圖南爲丞相史天

章爲學士立明昇爲皇太子朝夕受學焉內設國子監教公卿子弟外設提舉司教授所教養郡縣生徒府置官曰刺史州置官曰太守縣置官曰縣令去釋老二教并彌勒堂始定賦稅十取其一天家無力役之征立進士科八道鄉試充貢有日次年會試宗伯廷試分五及第出身置雅樂置奉天征虜大將軍府于漢中以進取陝右置奉天征蠻大將軍府于夷陵以進取友諒秋廷試進士賜董璧八人及第餘皆出身有差冬命萬勝領兵出漢中攻刺踏坎侯普顏達失平章走獲其人馬萬

學海類編  
卷之二  
勝報捷而還

天統二年癸卯春命萬勝領兵十一萬攻雲南由界首入司寇鄒興由建昌入指揮芝麻李由甯番入二月初八抵雲南屯兵金馬山鄒李皆不至梁王孛羅雲南省廉訪司官先二日已走勝遣使四方告諭招安繼日齎宣牌面納降降者不可枚舉卽遣侍中楊源進表解眾以聞其表曰聖德孔昭誕受維新之命王師所至宜無不服之邦大軍旣發于三巴逾月遂平于六詔窮民交賀遠近同懽恭惟皇帝陛下智勇如湯文明協舜深慨

中華之貴反爲左衽之流矧在位之貪殘致生民之困悴恭行天罰遂平定于多方禮順人情卽進登于五位睠茲南詔鄰彼西戎藩公挾便宜行事之文專任儉人恣行饕餮郡守無惻怛愛民之意肆爲虐政害仍黔黎下詔楊庭出師討罪初臨烏撒蠻酋納款以供輸繼次烏隆敵眾望風而奔潰遂由驛路直入滇池士民冒雨以爭降官吏叩頭而請罪一毫不犯萬里皆安勝等愧以庸才欽承威命凡此大勲之集甚非小器之能皆聖人大庇之洪休抑諸將効勞之忠力也深入不毛臣愧

偶同于諸葛誕敷文命帝德齊命于有虞此文乃鄒興撰也夏四月梁王傳官大都領兵來攻城萬勝領兵回哨且孤軍深入大理約兵又不至戰士又多中傷于是畱遂水元帥府千戶聶董等領八千人與大都拒守同馬引兵還九月表韓氏女爲貞烈己酉辟劉湛爲仁壽縣教授湛學行優裕造就人才陞爲國子監祭酒

天統三年甲辰命萬勝領兵攻興元城不克而還巴州叛命司寇鄒興克之畱官鎮守

天統四年乙巳春更六卿爲中書省樞密院戴壽爲左

丞相萬勝爲右丞相向大亨張文炳爲知院鄒興爲平章俾鎮成都吳友仁爲平章俾鎮保甯莫仁壽爲平章俾鎮夔關鄧元帥爲平章俾鎮通江江寶英爲參政俾鎮播州荆玉爲宣慰俾鎮永甯商希孟爲宣慰俾鎮黔南冬徐圖參政姜珏來朝仍令守夷陵就役屯種置倉以瞻軍用是年吳王始遣都司孫養浩來結好書曰吳王奉書夏國皇帝閒者得姜珏誥命文義妥貼辛卯歲兵起蔡潁有陳友諒恃其土地之廣甲兵之強一旦迫區區之境不得已而應之三年遂滅元人本處沙塞今



反居中原是冠履倒置足下應時而起居國上流區區有長江之險相爲唇齒協心同力并復中原事定之日各守疆宇特遣使通好惟足下圖之秋遣參議江嚴答聘其書曰夏國皇帝奉書吳王足下邇者元人運衰中原氣盛天必降生豪傑驅逐元虜以爲生民主是乃天意之有在也第以中原人物解此者少尙爲彼用殊爲可惡足下應運而興目視赤子之塗炭想亦不忍也區區人馬二十萬北出漢中東下荆楚期靖殘虜以安黎庶特遣使奉復通好不敢後約唯高明諒之冬威順王

普顏遣平章領兵由雲南偷行小徑入陝西丞相戴壽追襲至秦州弗獲而還是月全蜀星隕如雨

天統五年丙午春夏主不豫召臣下諭之曰中原未平元虜未逐予志不能遂也此殆天意今西蜀險塞予沒後汝等同心協力但可自守慎勿妄窺中原亦不可與各鄰國構隙言畢遂殞在位五年壽三十六葬江北永昌陵羣臣尊上廟號曰太祖文武至聖皇帝遺詔太子卽位遣使報訃于吳及各國兼致遺物

方孝孺曰夏主方有意于據蜀各郡臣民遭青巾之

虐百無一二夏主幸致躬行儉約興文教辟異端禁  
侵掠薄稅斂一方咸賴小康焉惜不能謹之于始私  
家倍于公室倉帑空虛不能展其疆界歷年雖不永  
民至今感歎焉不能文詞閒盡其賢也

夏太子昇卽皇帝位年十歲尊母彭氏爲皇太后垂簾  
同聽政立妃王氏爲皇后改元開熙詔曰皇天眷命篤  
生我太祖皇帝恭行弔伐創業開基期靖中原以登至  
治顧大業未就龍馭上升舉國臣民攀號莫及予小子  
哀疚在躬而臣民以嗣位爲請謂神器難以久虛國家

不可無主懇請再三辭避無術謹于四月初一日祇告  
天地祖宗卽皇帝位子稚年涼德忝任君師惟敬天以  
勤民在修身而法祖繼承烈緒廣鴻業以無疆誕布武  
文祈天命于有永尙賴臣工協志同濟時艱補闕拾遺  
匡予不逮其以明年爲開熙元年除舊敷新與民更始  
仍遣使詣吳及諸國告卽位吳王遣使來弔祭又遣使  
來送葬又遣使賀卽位丞相萬勝與知院張文炳有隙  
密遣人殺之內府舍人明照等復矯后旨召勝入縊殺  
于崇文樓下拜劉楨爲右丞相

楊學可曰右丞相萬勝者德安府黃陂縣人也年當壯歲智勇過人夏主寵愛之妻以弟婦故稱爲明三數歲總兵征討信賞必罰士卒樂從所向克敵開國之功良多及夏主賓天主幼母后臨朝小人閒謀張萬自相屠戮非有罪而誅不及五載而國遂亡是自取之也

秋廷試進士龐百里等六人及第餘出身有差幼主吟桂花詩賜諸進士詩曰萬物凋殘我獨芳花心金粟帶微黃莫言些少難堪玩露冷風清大地香命丞相戴壽

領兵攻烏撒不克而還

開熙元年丁未保甯鎮守平章吳友仁移文于郡縣曰昔與夏主自沔陽而至重慶共樹奇勳開邦啓土今日者矯旨殺戮功臣我輩甯能自保乎遂據城謀叛遣使與陝西李思齊張良弼通而幼主數調兵征伐皆敗而還

開熙二年戊申大明皇帝來告卽位遣平章鄒敬奉書往賀四月丞相戴壽總兵八萬征吳友仁友仁入城自守謂壽曰不須用兵可遣參政文彥彬來卽投降是日

遂遣彥彬入城友仁與彥彬約丞相可設策將義子明昭等誅之不然必爲所害壽回奏事因朝會設計擒明昭等盡誅之友仁同彥彬至重慶請罪謝恩

開熙三年己酉大明遣使求木植丞相戴壽不與秋丞相劉楨卒楨元進士精于易數導明主修道盡逐元人以安中夏詔令多所代製人比之孔明云

開熙四年庚戌大明遣使借路攻雲南丞相戴壽不允秋再遣參政蔡來兼致禮物又不允明夏竟絕和好冬大明命湯和爲征西將軍平章廖永忠副之攻夔關

戴丞相向知院峽中設天橋預備船至以木頭撞下輒碎竟不得上屢戰不勝退兵峽外重慶城中每虛驚禁不能止

開熙五年辛亥春大明總兵穎川侯傅友德帥兵十萬路從階文攀緣山谷晝夜兼行蜀將平章丁世珍率眾來拒友德擊敗之生擒其將雙刀王等十八人遂克階川蜀人斷白龍江以阻我師友德修橋以渡奮兵擊攻拔果陽白水江蜀人不戰驚遁友德遣人諭降之俾各還本業兵趨緜州至漢江進取漢州友德欲以軍中消

息達湯和適江水暴漲乃以木牌數千書克階文緜州  
日月投漢江順流而下重慶守者見之爲之解體先是  
夏戴壽等聞階文不守遂畱鄒平章守夔關引兵救成  
都至是屢與傅總兵戰大敗入城堅壁自守傅園兵圍  
之會廖平章亦得木牌於巫峽乘虛併力攻夔關直抵  
重慶城下六月二十一日夏丞相劉仁扶幼主并皇太  
后彭氏齎符璽詣軍門降在位六年時十六歲成都兵  
皆被困躡藉死者甚眾會湯和至遣其子納款降友德  
按兵入自東門秋毫無犯成都既平分兵徇下川蜀之

未平者因籍其兵壯置守各要害得路府七元帥府八  
宣慰宣撫司二十五州三十七縣六十七官吏將士五  
萬九百九十人馬騾一萬三千八百餘匹友德同廖永  
忠遣指揮高德送幼主并彭后符璽及金印冠冕儀仗  
銀印五十八銅印六百四十送至京師大明封幼主爲  
歸命侯彭后爲王妃賜甲第以居以劉仁爲應天府府  
尹餘除授職有差明氏前後二主起於至正辛丑止於  
洪武辛亥共十一年

方孝孺曰幼主雖春秋未富德性純雅通孝經論語

學海類編 卷之  
三  
為權臣執國命不能宰制所以內相屠戮自剪其羽翼是以國內空虛天戈一揮若崩厥角歸于大明一統固其宜也

附錄

當玉珍時辟鳳山趙善璞爲翰林學士善璞不就退隱于樂殞山中所著有陶真集正誼藁行于世自述一歌曰錦里棲遲處飄然遠俗囂地偏車馬少山近市塵遙謝事惟求避居官懶折腰讀書明至道忘味學遺韶對坐花千點充飢水一瓢放情隨洒落得句自推敲種竹開三徑橫琴詠九皋唐虞今在上許我學由巢

